

Panevropski univerzitet i Jiaotong Univerzitet u Pekingu dogovorili saradnju

APEIRON PRVI I U KINI

Delegacija Panevropskog univerziteta posjetila je u oktobru Beijing Jiaotong univerzitet u Pekingu i tom prilikom potpisan je sporazum o razumijevanju i saradnji ove dvije visokoškolske ustanove.

Sporazumom će biti omogućena razmjena studenata i nastavnika, te saradnja dva Univerziteta koja je usmjerena na obezbjeđenje vrhunskog kvaliteta u nastavi, razvoj zajedničkih studijskih programa, naučno-istraživački rad i druge akademske projekte.

Potpredsjednik pekinškog Jiaotong univerziteta Chen Feng istakao je da njihov Univerzitet radi na projektu kineske vlade u oblasti obrazovanja i kulture koji je u Pekingu dogovoren sa 16 zemalja iz Jugoistočne Evrope.

- Panevropski univerzitet je prvi iz Bosne i Hercegovine na putu ka realizaciji našeg projekta, sa svim svojim resursima, kapacitetima, svojom inventivnosti, sjajnim rezultatima na naučnom i obrazovnom polju. Akcenat naše saradnje u početnoj fazi stavili smo na mobilnost studenata i profesora ova dva Univerziteta, dodao je Chen Feng.

Inicijativu za ovu saradnju pokrenuo je kineski Univerzitet, posredstvom ambasadora Bosne i Hercegovine u Narodnoj Republici Kini, gospodina Borislava Marića.

Jiaotong univerzitet je jedan od najkvalitetnijih univerziteta u Narodnoj Republici Kini, osnovan 1896. godine, koji samo u Pekingu ima više od 30 000 studenata i ima još pet kampusa širom zemlje.

Rektor Univerziteta Apeiron prof. dr Esad Jakupović naglasio je da studenti koji budu zainteresovani za program razmjene sa Jiaotong univerzitetom moraju dobro vladati engleskim jezikom, s obzirom da će se sva predavanja izvoditi na tom jeziku.

-U narednom periodu sa našim novim partnerom iz Kine krećemo u zajedničku organizaciju konferencija i seminara, istraživanja, zajednički rad na naučnim programima i kursevima, a sve za dobrobit naših studenata kojima smo upravo pomjerali granice mogućnosti u obrazovanju, rekao je predsjednik Upravnog odbora Panevropskog univerziteta "APEIRON", gospodin Darko Uremović.

Delegacija iz Pekinga će uzvratiti posjetu na proljeće naredne godine, kada će se dogovori o zajedničkom radu proširiti.